

Obukoni bw'eBolâ

[Original English version published online:] 11 Décembre 2025

Kinande version published 21 May 2026

| Questions et réponses en Kinande

Obukoni bw'eBolâ níki kwé?

Obukoní bw'eBolâ ni bukoní bukáliré momó bwangabyá ísíbuisungika kutsíbu. Bukásire omo virisi eyílólíre okó kíhandá ky'amakoní akáhulawá mo genus *orthoebolavirus* áw' e-*Filoviridae*. Oko mbírírí y'eríholy'abandú, erilwa oko 25% erihik'oko 90% y'abandú bakwírebó bakáholâ.

Erihika okó bíró byá munábwíré, hámátásungiká míhandá ndatú y'esyovirísí sy'e Orthoebola, omókátí kásyó, halí míhand'ísátu éyikahenduká mó kíhunzó kínéne (n'ibug'ambú, éyikálwalay'abandú bānené bo kutsíbu:

- evirisi y'eBplá (EBOV) éyikáletera obukoní bw'eBolâ (EVD)
- evirisi Sudan (SUDV) éyikásigir'obukoní bwévirísí y'eSudán (SVD)
- Evirisi y'eBundibugyó (BDBV) éyikáletera obukoní bw'evirísí y'eBudibúgyo (BVD).

E-Réservoir y'esonyamá sikálwirá kw'esyovirísí síyasíbwê. Náho tsé ngokóbakásosékánayá emílimálimá éyikály'amatúndá (*Pteropidae*) yikábyá nga yó nungá yá syo.

Ni ma-signe kí awálólire oko bukoní bw'eBola kwé?

Ama-signe w'obukoní bw'eBolâ bukásá lúbá neryó okoma-signe ayó, kuli:

- efiévre, ní bug'ambu omubírí ínahúhána
- endúhí
- obúlumí bw'ama-muscle
- Omútwé ínalumá n'omumeró ínasesa

Ama-signe ayó akánákwamawá na:

- erísálá
- eríhara (diarrhée)
- ekísési
- eríyisendyá k'omusásí emwísi y'omubírí n'oko mubíri kw'eyíhyâ

Omundu akábyá amábihambiká n'obukóni, hakálabá ngá bíró bíngáhi ama-signe ámúbutukékô?

Erilwa oko infection erihiká okó nzukó yáma-signe, bitsúkíre okó bíró bibírí (2 jours) erihika oko bíró 21. Abandú bakábyámó w'erísigirýá obukóni bábíbutuká kw'ama-signe.

Momó bandú banganábútúká kw'ama-signé awálingá w'eBolá, e-test éye-labatoire yó yikákanganayá ndeke (erí-confirmer) ng'ásire oko eBolâ.

E-différence eyiri entre obukoní bw'eBola ná wandi makoní áwama-signé ásósire awáyo ní yáhi kwê?

Ama-signé w'obukoní bw'eBolá bukábutuká lúbá, ná kandi bukásonda abángangá abaká-soigner-bó íbatsuk'erí-soigner bo lúba.

Busaná n'ama-sígne erisosáná, si mwátsi alóbíré n'okó bánganga eriminyá kwenené nga bónobukoní bw'eBola óbuté bundi bukóni óbukáleterá ng'akapururú, e fièvre typhoíde, e-dengue, kútsé n'obukoni bw'evirísí y'e-Marburg.

EKyó kyokikáleká ambu kúmbe abandú ábalí n'ama-signé awásósiré w'obukoni bw' eBolá íbálw'ibáyíloléryá éyiry'omúngangá oyúkátunza amakóni. Eri-tester, kikábyá ky'okiká ky'erímbére okw'itoká erisosekaniá ndeke ekílyáleter'obukóni; ni kiká ky'elazíma okw' ipatá obútunzí óbwákwenene. Eri-tester lúba n'erítunzá lúba rikáleka abandú íbasábúká n'erí-proteger e-communauté n'abandú b'okó kíhandá, hágumá na ba-yífirimi b'omo muyí n'abandú ábakátumiká nábo.

Obukoní bw'eBolá bukáyi-propager búti kwê?

Engingá néné, obukoní bw'eBolá bukálwa ok'omundw'oyú íbwáhiká n'okówundi oyú esáha bályábyá exposé oko musási kútse oko liquide ikálwír'oko mubíri (ngendó néne okó mábí, ebísáló, ólunzá n'ebítándê) ébyomundu oyuli infecté, oyúkiné muzímá kútsé n'oyúholíre. Ebí bikákolek' esáha evirísí yíkingira omomubíri yíkálaba áhasáíre kútse ebiyingó ébikániiná íbyaleta e-liquide (áwalinga magétsé) (ng'amésó, eníndo, kutse obúno), le plus souvent esáha omundú akátunz'omukóni kútsé ákatula oko mubíri w'omundu oyulyáhola n'obukóni.

Ná kandi bukáyi-propager omundu átula kútse a-utiliser ebindu ebíryábya contaminé na máhira akálwá oko mukóni kutse okoyúlyáhol' omo bukóni munyé óbw'eBolâ.

Hakánábya níbyá, mais ni rare, e-transmission éyalw'oko múlumé oyul'ya survivre ínáhambukísya ómukalí wíwe esáha bakályá kúbyô. E-cas yíring'eyo yikákoleká busana evirísí yikáná-persister okó bíro bílébé omo mbuto y'olúbutó lwá bálumé báyimá báyima bábilama oko bukoni obô.

Lítólere abandú íbáyírá báti okw'íyi-tsunga omúgulu w'ekíhunzó ky'obukoní bw'eBola?

Esáha y'ekíhunzó ky'obukoní bw'eBolá, abandú banganayítsungá bam'ímya ama-mesures áwaká-réduire e-risque ye infection. Ní bug'ambu:

- eri-éviter erítulatul' oko bandú abóbákálangirá ngá bákwire obukóni kútsé ábabíriminyá ko bákwire obukoní bw'e'bolâ;
- erigana erításyátula oko mubíri w'abandu abábyá na ma-signé w'obukoní bw' eBolá bábíholá múbô, wamábyá ísiwátímya ama-mesures awátóleré w'eriyítsúnga; ná kandi
- erinaba okó byalá ko régulièrement, ukákola ngoko aba-autorités benyu baká-recommander omundú ng'ínánáb'okó byalá kw'áti.

Abandu bangáyi-protéger báti mupáká síbabyé infecté n'esyonyáma?

Abandú banganáyi-protéger bátóke eriganíbya infecté n'esyonyáma bamábyá bákayirá batya:

- eri-éviter erírya esyonyamáfu kútse erítulá kúsyó enginga síbátímya ama-mesure w'e-protection, surtout omúgulu obukóní bw'eBolá bwámákíkóna;
- erinaba oko byalá kó ndeke embere n'enyuma y'erítula okó buli nyámá, kútse ama-produits álwire oko nyáma; ná kandi
- eríhuká ndekéndeke ama-produits álwire oko nyámá (omusasí n'eyíswí) embere y'eríryá-byô.

Abalí n'e-risque nené ní bahi?

- Omúgulu w'ekíhunzó ky'obukóní, ábali n'e-risque nene y'eríbya infecté ni:
- abayífirimi n'ábakákol' emibirí y'erítúnza bákábyá n'e-contact direct n'abakóní;
- aba-soignants, ába-membres b'ókó kíhandá kútse n'abandi bandú ábalí n'e-contact physique direct n'abandú ábali infecté; ná kandi
- abályayalira bákábyá n'e-contact physique direct n'omubirí esáha yama-funérailles kutse esáha y'ama-rite w'erít'ekínda.

Busana náki ábakátunzá bali omo risque nené y'erípata obukóní bw'eBolá kwê?

Abayífirimi b'e-communauté n'abátunzi b'abakóní bali oko bandú b'e-kwánzá okw'í-déetecter amakoni máhyáká omo communauté, eri-lancer ama-alertes, n'eríbwira ábalwéré ngokó banapáswa erigenda oko dawa kw'elupítáli.

Abayífirimi n'abátunzi b'abakóní n'ábakátumika omo service ye santé y'e-communauté balí n'e-risque kúlaba y'eríbya infecté esáha:

- síbámbalire ekiipemá y'e-protection personnelle yó ndeke (PPE); ná kandi
- ná nginga síbalí-appliquer ndeke ama-mesure áw- e-prévention n'e-controlé (IPC) omúgulu bakátunza abakóní kútsé bakáyi-occuper oko kindá ky'oyulyáholâ.

Kundi ama-signes w'obukóní bw'eBolá ásósené n' awándi makoni owo bandú bákapatá, abayífirimi b'e-communauté n'abátunzi b'abakóní banganábyá ísibátá-utiliser ama-mesure awátólere áw'e-prévention ye infection ná w'e-contrôle okw'iyitsúnga.

Kúmbe omundú ínáyirá tí amábyá ímwákábyá n'e-contact physique direct n'omund' ów'obukóní bw'eBolâ?

Wamábyá imúkábyá n'e-contact physique direct n'omundú oyuli infecté kútse oyúkábyá suspecté kwákwíre eBolá, ukábyá iwámábyá n'e-risque y'erikw'oko bukóni. Lítólere kabísa íwayásung' omútunzí w'amakóní kútse íwáyá éyiri e-dispensaire yo hówenyú bátóke erikuháná ng'úyíry'úti.

Une fois bamábikusekaniá ng'ok'úli mu "contact, e-santé yagu yikándíbyá ikalyebibwá oko múda wá bíro 21 erilwa omúgulu wábya exposé. Aba-autorité locales kutse abayífirimi n'abátunzi b'abakóní bakándikú-guider ng'ubyé úkátambá wúti n'eríku-encourager:

- eríliga eripáta e-visite yó bulí kiro y'e équipe eyíkásululikaná n'ama-contact okw'i-suivre e-santé yagú, erífwataná n'e-occupation yágu;
- ulígé uti e-température yagu yibya ikimibwá;
- erí-répondre oko ma-questions kó ndeké ngokó wangátóká n'eríbábulya ama-questions awówangabyá nágo, n'íbug'ambu nge arrangement eyówangánziré íbákúkóléra;
- eríbábwira ama-signes (wámábyá nágó) omúgulu w'ámábutuká w'ókô;
- eri-éviter erí-voyager à moins que olugendo oló mólwanábya discuté n'omu autorité w'e-santé yo hówenyu; ná kandí
- erímya e-vaccin yamábya disponible. Bakandiku-encourager erisaidirya okw'-identifier aba-contact bagú mupáka nábo bapáté e-vaccin.

Ama-signe amábutuká omó múgulu bakinákúkwama bákalebyá e-santé yagú y'ókó bíro 21, bakandikuhana ambu ugénde oko centre de soins eyótólere. Bamakúbwira ambu ufányé e-test y' e-laboratoire, ama-résultats akábyá ínakándí-guider abángangá ng'unapáswa erilw'iwápánga elupitáli okwítunzirwá yo kúts' iyéhe.

Hané hásungika edáwá y'erítunz'obukoní bw'eBola kwê?

A partir y'ama-succès w'esýodáwa esí, hané esyo-traitements nyíhyáka es'yobakiná-évaluer okw'i-traiter áwandi ma virísi awákábulawá mo orthoebolaviruses, alíwe esýodáwá esýó síbalíbabuga erísí-tester ndekéndeke.

Wamábya iwé kútse omundu oyukuloléréko amábya e-test yíwé íni positif oko bukoni bw'eBolá, eríyitunzísáwá lubá oko centre eyílolire oko traitement yikábyá íni ya kwánza kandi yikábya iyanga-améliorer e-chance y'erísabúka. Erítunzwá ni gratuit, kandi bakábyá íbakándihira kw'e-rehydratation (eríkúsubyá mwá magetse), eríkúh'ebyályá ebíólere okw'íryá, n'erí-gérer ama-signes w'obukoní bukúlikô.

Erítunzwá lubá ríká-améliorer e-survie (erísabúká), kandi yikásaidiraya okw'i-casser e chaîne éy'e-transmission omo communauté n'omo ma-familles.

Abakwíre Ebola, banganábya soigné éká wábo kwê?

E-Organisation mondiale de la Santé síyirihana yiti abandw' íbóbanátunzíry'abákubó b'éká, abályahimbikawá n'obukoní bw'eBolá. Abandw'ábalí n'ama-signe w'eBolá, lítóler' íbagénd'elupitálí. Erítunzwá luba oko centre de traitement yikábya iní kindú kya kwánzá, ná kandi yiká-améliorer e-chance y- eríláma.

Omundw' ámaholer'éká íbanámú-suspecter kwo kw'ákwire obukoní bw'eBolá, abandú b'e-communauté n'óbokókíhanda kíwé, kúmbé ísibábyá ngabóbakándimútlákó kútse eri-préparer amáiti wíwe w'erímútâ. E-Commauté kutse abandu b'ókó kíhanda kíwe kúmbé íbalw'i-ba-contacter aba-autorités locales de la santé bátóke erikolá k'obitokekane n'erímúta omo dignité y'omundu oyulyáhola bákákwwama erisondá ry'ábokókíhanda.

Abandú bangáyira báti bamasonda eri-voyager esáha hámábya ekíhunzó ky'obukoni bw'eBolá?

E-Organisation mondiale de la Santé síyiri recommander e-commerce kutse ama-restrictions ng'erikingira abándú kútse eríbáhira en quarantaine omo biharó ébiri affecté n'obukoní bw'eBolá.

Olugendó lw’omundu oyúwabíribya mu-contact yamábya nécessaire, kúmbe íyatátsuka eríbya discuteé n’eríbya supervisé n’aba-autorités publiques de la santé bátóke erí-assurer ng’angáéndelea eríkwamw’áti omo kiharo ekyályayámô.

Translated into Kinande by Philippe Mathe Ngessimo Mutaka for Athinkra, LLC based on “Ebola disease: Questions and answers”, WHO, December 11, 2025. WHO is not responsible for the content or accuracy of this translation. In the event of any inconsistency between the English and the Kinande translation, the original English version (<https://www.who.int/news-room/questions-and-answers/item/ebola-disease>) shall be the binding and authentic version.